

靈巖山人詩集

靈巖山人詩集目錄

第十七卷 古今體詩

聽雨樓存稿

閼逢涪灘

過光明殿訪妙正真人登天元閣展眺京師形

勝二首

絢春園卽景十首望望山先生

曹竹虛小畫舫前紫丁香一株盛開招同劉復

先樸夫存子洪素人小飲得句

與王夢樓談揚州舊事

晚春訪王夢樓遇梁副憲階平前輩邀同人小

集陶然亭分韻得足字

望山相公壽讌詩四首

送王夢樓同年出守臨安

喜王石亭入都話舊得詩三首

芷塘移居接葉亭距予寓樓相去數武月下走
訪漏四下始歸贈詩四首

中元後一日暮同嚴東有陸健男訪王蘭泉步
至法源寺是夕陰晦無月歸飲蘭泉寓齋聞
話至三鼓散去

陸郎曲爲童梧岡作

盤山紀游詩六十首

過大嶺作

宿香林寺

登寺樓望空桐山

登漁山

漁水

醴泉院

金章宗避暑亭

望鐵嶺

涼泉

雞蘇砦

塔院莊

瓦茶寺廢址

亂石莊

夜宿廣濟寺

犬石澗

盤泉

瞭甲石

東厓觀蒼龍松

環翠亭

中盤寺西齋夜坐偶書

北岡

碧峯寺

萬松寺

寺閣月夜對瀑作

沙嶺

白巖寺

望九華峯作

千像寺

奇石

紫蓋峯

宿鰲峯

少林寺夜宿

東竺庵

雲淨寺

西峯

挂月峯

曉題茶子庵壁

法藏寺

松篷

談禪石

雙峯寺

百草窪

天成寺

李靖庵

舞劍臺

西甘澗

東甘澗

招提寺

松棧

縣石亭

雲罩寺

夜題寺樓壁

澤鉢泉

舍利塔

黃龍祠

歸雲洞

感化寺觀唐道宗大師遺行碑文

過李鐵君隱居

夜題鐵君齋壁

將出盤山畱別鐵君

哭董庶常東亭

靈巖山人詩集卷十七

鎮洋畢沅秋帆一字續蘅

聽雨樓存稿

關逢沼灘

過光明殿訪妙正真人登天元閣展眺京師形勝

二首

翠島銀宮禁苑偏叩關重謁地行仙蠟梅一磴堆黃雪客歲四月

廿八日偕王詔堂走訪時杜丹盛開與真人小飲花下寒竹閒房鎖綠煙杖履風光娛晚福

畫圖松鶴記前緣時以小照索圖圍爐重話

先朝事頭白銜恩四十年

百尺丹梯逼紫宸瑤窗洞豁淨無塵諸天宮闕分蒼昊大

地山河拓廣輪祕籙寶龜文莫識聽經祥鵠性偏馴碧壇
擬乞長生訣定許星冠謁上真

絢春園卽景十首呈望山先生

西苑開圖畫平泉有

賜莊鳴珂連戚里規地傍

宮牆別墅飛紅雨長堤夾綠楊迴環仙島路翻似水雲鄉
天上春如海嘉名是

御題西山當戶直北斗挂簷低虎豹蹲奇石虹蜺臥斷溪
武陵人不到洞口望還迷

漱灩澄波綠平塘曉鏡開荷花明碧浦翠鳥立蒼苔好雨
浮蘭槩迴峯隱釣臺繞園瓜蔓水源自玉泉來

何必游仙境條風暢素襟紅闌環曲榭翠黛滴遙岑鏡裏
重看畫屏中好聽琴碧城珠樹曉翹首五雲深
長廊隨月轉小閣對山宜奇樹移三島名花占四時綠深
鶯坐穩黃褪蜨飛遲庭院春如水湘簾鎮日垂
纖塵飛不到彷彿化城居香篆紫吟榻花光透綺疏竹棲
金翡翠案壓玉蟾蜍四壁芝暉麗紗厨護

賜書

樓閣參差見簾櫳宛轉通幽香宜入座馴鶴不歸籠瓊樹
枝枝綺晴雲面面烘微風動鈴索玉佩出堂東
杖履但隨興春風花柳村綠蓑懸小圃白版敞疏軒屋角
侵飛瀑畦邊綠短垣三時重農意想見在林園

綸扉方載筆折簡記招遊東閣華簪合西園飛蓋畱鐙前
頻顧曲酒後又移舟此日重尋勝風光儼十洲

廣廈曾容庇靈槐早紀祥堂開裴相墅花發令公香別館
雲泉勝仙鄉歲月長近聞調燮暇柱笏憩仙莊

曹竹虛小畫舫前紫丁香一株盛開招同劉復先
樸夫存子淇素人小飲得句

繡豔晴紅綠靄天無多紺影漾尊前王家步幃絲成錦霍
氏文釵玉化煙細雨玲瓏愁不斷曉風瓔珞夢常牽莫將
本色全然改渲染春心絕可憐

與王夢樓談揚州舊事

隔岸平山敞綺軒瓜皮艇子載壺尊席邊芳草延今古江

上浮雲變曉昏一賦蕪城追鮑照十年京雒滯王孫竹西
香夢春無影璧月珠簾總斷魂

晚春訪王夢樓遇梁副憲階平前輩邀同八小集
陶然亭分韻得足字

重城閤風雨寢跡臥老屋偶然走庭除花柳漾朝旭出門
訪王郎笑言接款曲謂言久不至思君腸轉轂今日天氣
佳黃鸝再三告便可游城南聊以慰檢束城南有良朋致
書不待速聯轡出市門漸已遠塵俗迢迢深林中孤亭現
一角仙侶六七人禪房兩三曲夕陽嵌瓏玲谷鳥響剝啄
巾烏雲上青鬚眉竹間綠逡巡翦葱韭從容酌醯醢莓苔
上下牀蘿薜東西幄繞亭多菰蒲積潦泛巖谷荇藻牽迴

風泠泠漱寒玉小樓出鳥背可以豁心目西山萬里勢攬
之不盈握羣公有清興列坐依水木逍遙撰良辰觴詠聯
芳躅僕本淡蕩人竹石素所欲春明滯數年風塵苦鹿鹿
抗心師往昔遵跡念寒燠飛光如駛流何爲自局促努力
縱談笑日短不可續天光倒空尊霞影曳輕縠君看亭樹
間白雲下來宿

望山相公壽讌詩四首

展觀歡逢嶽降期靈光早受

兩朝知香山妙句香光字老鳳清聲老鶴姿繡虎才人稱
弟子金蟬屬吏半台司薇垣此日傳佳話麻草新添祝嘏
詞

列戟門楣奕葉光手調元氣佐巖廊魏公勲舊家貽笏郭
令親賢里表坊外國人傳相司馬中天治本軼姚唐韋平
事業從來少七十阿衡鬢未霜

喬柯百尺記靈椿耆碩功名總絕倫功在蒼生呼活佛事
光青史冠名臣化工長養春無迹風月雕梳筆有神操行
潔貞同白璧飛行還作地仙人

蓬島蟠桃熟幾回戟門連理記雙槐袞衣風度思南國珠
斗光芒朗上台

帝許棲霞分一角民歌吉甫望重來恩波潤比江流遠不
繫舟前日溯洄

送王夢樓同年出守臨安

滇雲驅五馬控制及雕題壯士歌黃鵠才人賦碧雞心依
珠斗北夢杳玉河西影事隨鴻爪輕痕印雪泥

少住終何益分襟倍黯然鼎占折足象花斷並頭緣

時持戒律甚嚴

詞社彫顏色歡場寂管弦登樓慵悵望人遠夜郎天

惜別翻愁聚重逢在幾年蘭交風誼重杏籍姓名傳徵逐
人三五分攜路八千升庵遺韻在花髻說前賢

麗藻爭春發優曇香影分蒼山屏石畫洱海墨池雲奉佛
生前慧工書海外聞花前及酒後事事總思君

喜王石亭入都話舊得詩三首

相逢意外轉相疑喜極真堪慰渴飢昔昔游蹤都似夢紛
紛別緒久如絲文章行篋今逾滿珠桂家鄉苦弗支回首

春風同硯席不知離索已多時

余與石亭別已十年

剪燈舊雨其心論塵影渾如刻劍痕宿草人多登鬼錄

文謂

芳落英路已失仙源頻年錯莫成彈指往事飛沈總斷魂

莫怪君來我又去望雲久已戀晨昏

予擬於首夏乞假南旋

歷歷髫年事不忘半分明處半蒼茫迎來故侶人如玉數
遍新愁鬢欲霜茅店雞聲悲不子寥天鴻爪費思量今朝
同聽樓頭雨猶認江鄉夜對牀

芷塘移居接葉亭距予寓樓相去數武月夜走訪
漏四下始歸贈詩四首

巷接青楊載酒頻紅樓斜隔小園春合歡雙樹窺孤榻聽
雨層樓憶美人泥滑也思憐畢曜月明還擬訪崔駟問誰

聽鼓應官暇詩卷閒消自在身

北宋南施旗鼓同西崖時論亦稱雄十洲裙屐追詞客一角鶯花付寓公今雨重尋塵劫後舊題細認子亭中懷清

舊趾知何處寂寂秋風咽草蟲

亭爲西崖舊寓

繞廊愛種碧檀欒日暮天寒倚檻看孤夢江湖漁舍穩雙棲玳瑁燕巢安猗蘭曲罷爐煙歇落葉聲喧客語寒攜手出門還少住薄襟未覺露珠溥

一編長日靜偏宜嬾雅如君俗可醫小閣妙香花放足疎林清影月來遲幽居恰稱閒官味當局誰矜國手碁結隱他年尋舊約白蘋江上更相期

中元後一日暮同嚴東有陸健男訪王蘭泉步至

法源寺是夕陰晦無月歸飲蘭泉寓齋間話至
三鼓散去

王郎居鄰古蘭若地偏絕少閒游者好客多應乘月來不
圖明月偏相左山門一逕暝色深兩三僧立古松下禪房
數折清且幽竹徑苔陰遞瀟灑露除開遍碧桃花優曇浮
出青蓮朶南階古柏金源物香葉如雲幹如槎深秋叢薄
翠影寒彷彿名山眼前墮燈微隔院聽人行獅古對蹲疑
鬼坐衆師垂頭若鸛鶴杪擺隱現長明火頓覺塵襟是處
空始知法海無邊大茶罷歸來已二更更陳酒醑羅瓜果
舊游歷歷話鄉關夢裏風花憐旖旎同是吳頭楚尾人欣
慨無端燭漸熄燕市酒徒半散去如此佳會亦云寡出門

各駕短轅車珠斗銜城鼓三打

陸郎曲爲童梧岡作

客愁零亂如秋葉翰林主人意不愜涼雨聲中悼陸郎蕭
齋清夢空驚厭髫齡小史玉山同家住吳松東復東九峯
屐染橫雲翠一幅帆懸潞水風生來命蹇將誰憖失身悞
逐青衣隊曾向侯家作豎奴典琴爲伍真生悔自悔飄零
滯上京雪鴻蹤影托蓬萍朱門早決抽身計青眼偏饒擇
主明主人恰遇金閨客清才雅擅無雙格前身合是杜樊
川傷春花底經淪謫華堂絲管逐番新水調聽殘閣幾春
酒痕紅到櫻桃面不數歌筵窈窕人短衣窄袖工裝束常
奴那比方回僕感恩詎復計辛勤識性應知到心腹星軺

往歲粵西行蠻箐猺獫毒雨冷七旬眠食資調護親切真
逾骨肉情零陵江水清無底失足波濤起尺咫一片倉黃
急難心濡泥那顧灘流駛萬里風霜往返俱恐教寂寞悵
離居烏絲手畫供摹帖紅蠟宵擎伴校書家居兼荷千金
託自憐顧影勝衣弱誰知蕙質望秋零瘦骨纏綿儕病鶴
一經齋後寓初移夜月丁香發幾枝我來訪舊齋頭過猶
見匡牀獨坐時折脚鐺邊聊自訴黃花晚晚風光暮只言
消受主恩深福薄豈真緣藥誤一朝短夢醒黃梁玉折蘭
摧幾斷腸千古才人傷穎士三生詞客笑雲郎昨夜露華
澌碧宇牆根絡緯啼無主茂陵孤館病文園起擁單衾淚
如雨半幅冰綃繪玉兒

時以遺照索題

霏霏好句寫相思

梧岡有詩題卷端

擬

憑山谷余成傳程二魚門爲作小詩重續虹亭本事詩人生有情類如此
此夜夜招魂勞剪紙紅豆枝前十二時青楓江上三千里
勸君珍重宰官身過眼空花本不真鬢絲禪榻秋燈畔一
卷楞嚴了宿因

盤山紀游詩六十首

過大嶺作

谿轉峯勢變磴道盤犖嶢罡風颯颯吹竹林走筍殼日輪
大于盆去天知幾握入雲復出雲衣霑身不覺遙見古漁
陽暮城飄畫角

宿香林寺

入寺近黃昏松關犬驚吠假宿得雲房茶瓜敘禪話途長

倦難禁託故揖僧退破窗月一痕照我解襟帶夜眠涼不涼石榻花陰蓋

登寺樓望空桐山

平明凭危欄山色翠如洗薊北距隴西迢隔六千里曷爲鼎湖龍子彼忽于此世多步虛人大半傳訛耳入林訪白雲雲是古時水

登漁山

癖性愛探幽攀躋蘿徑永右旋復左盤曲折造峯頂俯視薊州城人家落簪井浩浩天風吹頓覺衣裳冷索茗向僧庵石門叩松影

漁水

溯源知源遠沙觜聲淙滴昨夜前村雨稍覺晚流急峯影
抱天光冷翠浸應濕枯槎徑丈長苔蝕沙痕澀漂去無人
知上有一雅立

醴泉院

今名靜安寺
本淨名寺

漁山西復西祇園恣幽討竹徑敗籜堆盈寸無人埽白沙
漾泉清碧蘚壓碑倒緩步巡長廊畫壁尙完好一僧不知
年石堂見松老

金章宗避暑亭

雲門連月岫風磴帶沙渚廊榭晝陰森金源此銷暑閱世
會幾時方花平古礎蒼茫斜照中村人礪樵斧蘆稌不斷
青蕭蕭認秋雨

望鐵嶺

馬首瞻遙岑駢黹擢林表如何秋未深燒色滿重幬應是
米襄陽縱筆弄機巧萬丈鵝谿絹墨瀋潑初了皺成欲雨
山濃雲百層繞

涼泉

道左見澂泉涓涓出巖隙石凹自成池深約兩三尺不竭
亦不盈倒浸天光碧何當挈數餅遠寄熱中客只恐竹鑪
頭煎熬增水厄

雞蘇砦

五代梁開平二年劉守文以滄州之衆并招契丹吐谷渾共討其弟守光戰于此爲守光所獲

誰使鵲鴿原卻屯羆虎士然其欲制人圖蔓翻戍已千古
遺笑談聞者俱冷齒所憐陰黑天青燐滿廢壘爭頭鬼啾

嗽不知身已死

塔院莊

緣岡曲折行旛竿見遠寺不意老樹村有此布金地因余
蓬島來齋膀乞題字落筆對仰藍爲撰重修記啜茗澗西
房竹影一簾翠

瓦茶寺廢址

在小盤山本
名定慧寺

古寺久荒殞命名一何雅穿竹過雲廊低徊不能捨草垂
露井智土蝕臥鐘啞法界颺靈旛拜甕埋破瓦尙有灌園
僧沿街送菜把

亂石莊

有法常寺今廢
古井石幢尙存

亂石激谿聲一莊圍竹翠獨姓數十家耕種足生計西行

百步餘荒涼入古寺可憐選佛場今作收羊地時有鄰村人來搗經幢字

夜宿廣濟寺

借宿古名藍石室圓如笠簷角挂飛泉夜靜水聲急侵曉揭窗帷嫩涼一陣入露雨兩莫分只覺庭蕪濕紫鶴亦無眠早向花臺立

大石澗

兩峯各鬪高入天猶未住大壑橫其間石亂水聲怒不知是何年沿厓鑿細路崇朝浩浩風數里蕭蕭樹羣蟻不避人隔岸自來去

盤泉

最愛盤之阿峽壁平于掌縣泉如玉虹直下數千丈何人
構草堂畢身此偃仰一琴一卷書清晝闕軒楹臨流無四
時齧石白雲響

晾甲石

不意深幽區巨石名晾甲俗云貞觀年戎衣曾此搭遺跡
遂流傳題詠韻爭押或值晴暄時游人足力乏亦來藉雲
根解帶堆白袷

東厓觀蒼龍松

連厓展長屏古松冠男岌深訝快晴時神物亦騰螭天矯
鱗之而勢欲擎雲立我思馭以飛風霆看呼吸上下任迴
旋翠濤一天濕

環翠亭

中盤小紅亭半昇憑闌坐森森樹千章
僂僂峯數朶石似飛不飛雲將墮
未墮品題固自難圖寫有誰可怪底
袂衣涼萬綠四圍我

中盤寺西齋夜坐偶書

假宿得高齋秋鐙對禪侶欲品白雲
泉甌鑪松火煮玉茗味殊清竹根盃
亦古閒話興方濃漏下應三鼓明晨
晴不晴檐角風鈴語

北岡

搯筇陟高岡千尺看瀑布風聲水氣中
松與石爭怒凌兢躡虹梁失足恐顛仆
磴轉徑逾危過雲攔去路悔不從僧

言竹轎山門雇

碧峯寺

紺殿碧峯陰孤鐙照古佛境靜幽趣生坐深妄想不松影
亘長年冷翠透山骨山骨迸珠泉晝夜聲汨汨縱橫石面
流綠雲滙一窟

葛松寺

雲葉接飛泉樹頭縣峻嶺儻非迴隔凡詎有此靈境松寺
晤枯禪禪話頗奇穎坐頻增客衣不耐綠天冷房廊風雨
聲几席龍蛇影

寺閣月夜對瀑作

愛聽風泉聲寺北倚危榭前山未及游竹榻從僧借松頂

壁月升適與縣流射百萬斛珍珠亂向峯頭瀉寒光爛如
銀石閣不能夜

沙嶺

線徑羊腸蟠半里數休息袕寬衆水爭風定孤煙直石形
闢虎頭岡勢互龍脊遠望幽隴間秋雲萬層碧知多采藥
人沙印屨痕迹

白巖寺

鹿苑明殘陽松門愜幽玩殘雲鶴帶歸新筍蝮攀斷閒步
入禪房凝香憑石案辨義究魔醺大自在天也繙經譯樓炭脫葉
灑風櫺猶認天花散

望九華峯作

誰從玉井中九朶寒蓮萼層累堆此間化成峯峯粵浩浩
天風聲萬古吹不落雲葉或一片飄然下巖脚巖脚有禪
關石氣青樓閣

千像寺

晨入古招提雲根現千像誰憑斧鑿痕功德示無量不知
大乘禪貴能空色相散步香臺東幽翠落衣上金粟認前
身木樨一林放

奇石

距千像寺後半里餘一人推之則動衆人推之則不動

寺後半里餘礪磈獲奇覽誰云石丈頑動靜具靈感隻手
任推移萬夫難震撼居然古名將小怯大勇敢納交儻容
吾聞語首重鎮

紫蓋峯

一峯盤中央，亭亭如紫蓋。疑是諸應真，張之作高會。會罷各西歸，偶遺在塵界。倏爾琴麗形，化成破碣態。迄今庇蔭功，影落青天外。

宿蝦峯

太霄凝煖碧，遙海壓寒綠。厓顛無過禽，壁面有飛瀑。紺閣巖洞開，時見蝦獒宿。田盤仙去後，誰復繼芳躅。他時賦遂初，敲雲借林屋。

少林寺夜宿

入夜向齋堂，飽進伊蒲供。神幔捲華蟲，檐鈴銜鐵鳳。一點長明鐙，石龕與佛共。倦身投竹牀，著枕鼾聲動。松雲幾萬

層裊住游山夢

東竺庵

百轉盡松聲危厓架曲棧中休值小庵石窗臨翠澗飛花
不知名時漂紅一瓣林深磬散遲風定雲來慢靜坐道心
生令人薄羈宦

雲淨寺

板橋橫淺谿曲徑轉蘿磴悒悒小禪堂老僧方出定銅鼎
爇梅檀煙裊一聲磬秋陰竹檻涼曉雨石潭淨閒中獨倚
欄苔嶼引詩興

西峯

莎阪小低徊一峯極危峭蒼翠塞層穹數村無夕照厓半

忽聞聲依稀飢虎嘯飄蕭木葉飛長風鳴石竅鳥道撥雲
行僧返瀑邊廟

挂月峯

寺僧向余言良夜數三五山外月欲來萬丈白毫吐須臾
冰一輪峯銜恰當戶金波豔豔寒照此石堂古石堂無居
人蝙蝠飛相語

曉題茶子庵壁

晨興盥漱餘高齋照初旭盈盈露濕苔嫋嫋風翻竹道人
谷口歸肩擔薪兩束敲火向甌鑪爲煮桃花粥因挹水半
瓢搖動一池綠

法藏寺

紅牆周四圍翠壁擢千仞指節纔入門老僧迎問訊庭際
盤龍松終古屯雲陣非冬几席寒不雨簾櫳潤流覽水西
亭鹿迹蒼苔印

松籐

石上古松籐盤結枝稠密不用葺茅茨不須設蓬蓽率蘿
補作牆便是棲雲室自有謾謾風何畏炎炎日我與我周
旋起居緣天一

談禪石

松籐覆盤陀生成自貼妥傳昔有高僧說法此趺坐我聞
最上乘卽持默照可縱致天雨花脣舌費搖播試借祖龍
鞭驅去雲一朵

雙峯寺

厓縣石壓頭徑轉花迎面幢影昏昏孤鐙照古殿修廊
入磴陰滿地蒼苔片松鳥時一鳴雲深看不見盡日無來
人泉聲冷塔院

百草窪

雙峯塔下行數里遵旱麓一望渺無垠草色黏天綠野花
不知名日煖散幽馥相逢采藥人筠籃荷金斚未必卽神
農焉知非鬼谷

天成寺

古寺抱千峯谿喧境愈悄石色碧嶙峋入天猶未了殿後
躡危梯樓高結構小小憩捲疏簾欄楯出林杪一蜨挂冷

雲松枝青嫋嫋

李靖庵

唐時李衛公結茅讀書處
泉石頗清幽
虛堂爲小住
遺像如有靈
應知我情懷
抽刀向琅玕
待刻新成句
鐘聲出翠微
招客上山去

舞劍臺

西峯舞劍臺亦衛公遺迹
想其激揚時意氣
乾坤窄暨乎際風雲
勲名兩顯奕我來千載
後覽古三太息
麟閣安在哉
口落四天碧

西甘澗

山門頗清幽
古殿隱巖岫
僧徒只兩三
屋宇從樸陋
松雲

銷又生石筍峻而秀臨澗小遲回蘚石便盥漱湍急浪花堆天影千層皺

東甘澗

一嶺界西東荒蹊踐石卵秋澗聲潺湲流過夕陽煖茶隲帶蔬畦曲折籬笆短古松佛堂前童童如翠繖我獨愛經樓窗小青山滿

招提寺

半巘憩經堂茶瓜幽賞愜從僧入巖扉陞道再尋躡憑覽仙師臺風吹衣帖帖涼秋天氣佳雲散魚鱗甲獨鳥下平蕪夕陽山萬疊

松棧

松板架縣厓鐵繩相貫注彎環二里餘前通上方路翠壁
紅泉下人足出高樹天風不斷吹飛鳥未能度數杵寺樓
鐘聲帶白雲去

縣石亭

絕壁貼孤亭三面立紅榭雲根覆似船檐角凌空跨厓牙
絕傍著將卸猶未卸游倦思小畱欲入魂驚怕石華翠森
森萬古不知夏

雲罩寺

上方鐘早聞下方客未到天如碧玉盆周將寰海罩墜道
巖扉開日夜亂雲間怪樹破厓出作勢與風拗過客叩花
闌一蟬向僧報

夜題寺樓壁

入夜棲寺樓驚夢蒲牢吼自起攬衣裳揭幔臨窗牖明星
如藥珠摘煩一舉手準擬還家時小大掇數斗細擣和瓊
飴試釀流暉酒

黃帝內傳有金液流暉酒又金門歲節七夕造明星酒

澤鉢泉

恒沙來應真滌鉢此泉畔泉水瀏其清泉深尺有半游人
向紫厓高下勒銘讚冷碧浸天光風定雲行慢驀地浪紋
圓浮儵自驚散

舍利塔

金鈴晝夜喧畫塔憑空湧不知帶雲行但訝雙足重扶欄
一縱目千峯翠環擁罡風無斷時飛薨似搖動知已到層

霄銀河手可捧

黃龍祠

曉詣黃龍祠脩廊怪石夾僧延坐西齋松影到簾押幽探
得得來嬾問無無法蘚徑通沙坪茗莢嫩堪掐小立蘿磴
陰翠煙染單袷

歸雲洞

出本是無心歸亦非有意呀然巖腹深閒迹偶相寄曾爲
何處霖溟濛含濕翠卷舒還太虛肖我平生志他時移竹
牀來此枕琴睡

感化寺觀唐道宗大師遺行碑文

沙門知宗撰文節度判官梁知至書石

風便鐘聲遠追尋得鹿苑偶從梵夾傍唐碑見撮本敘文

簡且該波磔險而穩翠墨重摩挲禪房坐晚晚破雲一僧
歸夕陽在松阪

過李鐵君隱居

不謂素心交別來隱盤谷牆頭飛瀑明階下千峯綠山僮
解樵蘇何妨野如鹿秋蔬挈籠挑家釀脫巾漉心迹雨閑
閑成就著書福

夜題鐵君齋壁

松房耿秋鐙對坐話心曲示我山居詩連卷兼長幅秀語
本天成更番評且讀不知曙色分寺鐘動林麓出視堂廡
問秋露白于醖

將出盤山畱別鐵君

入山已經旬徧領溪山趣道院與禪關怪石及嘉樹目謀
心賞者一一賦新句行當辭故人撥雲覓歸路盤泉獨多
情送我出山去

哭董庶常東亭

潞河春水送君歸不道相逢願便違如此奇才今有古傳
聞或者是耶非新聲樂府吟紅豆駢體詞章壓紫薇

君有紅豆樹歌

流傳都下

誰唱旗亭楊柳曲那堪孤笛正斜暉

通州門人丁堦編校

靈巖山人詩集卷十七

靈巖山人詩集目錄

第十八卷 古今體詩

聽雨樓存稿

旃蒙作噩

太平鼓歌

觀耕臺侍班應

制恭和耕藉日祭先農壇祀成有述原韻

恭紀四首

饒霽南先生招飲澹秋書屋

聖駕四次南巡恭進權歌三十六首

謹序

以詩代書答友人見訊近況

先大父忌日作

錢舜舉寫東坡先生遊赤壁圖

登聽雨樓看山作歌

同年諸申之編修出守辰州作詩贈別凡以志
兩人交誼廿載游蹤俯仰流連不覺詞費得
一百四十韻

三月四日學士錢蔣石辛楷兩前輩編修趙雲
松曹來殷沈景初庶常褚左莪吳沖之中翰
王蘭泉程魚川趙損之汪康古嚴冬友陸健
男沈吉甫諸尸八重展上已修禊陶然亭卽
席有作

立秋

通州道中

將抵通州路遇李斗如王步東兩秀才應試北
上喜而有作

渡潞河

煙郊書所見

過桃花寺

馬上望盤山

飛泉

旅店聞蟋蟀

宿吉祥庵

景泰廢陵

秋日病起詒堂竹虛招飲寓齋卽席賦贈

秋日卽事同錢辛楣作

聽雨樓對雪用歐陽文忠公聚星堂雪詩韻并
效其體

靈巖山人詩集卷十八

鎮洋畢沅秋帆

一字縑蘅

聽雨樓存稿

旃蒙作噩

太平鼓歌

都人愛擊迎年鼓游手少年聚三五團團製就紈扇形繪
以龍鳳紛仙靈牯羯爲皮鐵爲骨左右連環互結屈逢逢
索索敲不停環聲鼓聲相間發初如金鐵揮錚鏦又如風
霆起倉猝疾徐中節心手合屢舞倏倏百態出兒童歡呼
如堵牆百十成羣走飄瞥都曇舊製久不傳柘枝遺譜尙
可述猶是籥章土鼓意含陽而動動萬物踏歌行試禁城

鐙放夜催開上元月角觥秋千百戲陳太平鼓擊太平人
衢歌巷舞迎新歲

皇帝龍飛三十春

觀耕臺侍班應

制恭和耕藉日祭先農壇祀成有述原韻

華滋浮土脈一墾兆嘉徵民事真難緩田功莫不增劬農
先嗇重禔福

聖躬承林外鳩初喚春原澤定勝

時土
望雨甚殷

恭紀四首

雲罕金根下

九重平田撫撫凍初融

扶犁一片勤民意猶覺安仁賦未工

麗日朝縣翠鳳旗五雲

端坐語移時試看珠玉揮豪處勝讀豳風七月詩

淡霧輕煙帶遠林鵲鵲聲似喚春霖

宵衣問夜頻祈澤不獨區區格致心

時京師缺雨上聞鵲鵲聲顧侍臣云鵲鵲是布穀石沅引

爾雅鳴鵲鵲郭注今之布穀暨方言布穀自關而東謂之戴勝並命和耕藉祀成詩當時呈覽上深爲嘉獎

橐筆賡揚侍

至尊瓊箋經進荷

褒恩至今

秘殿屏風上名姓猶畱

御墨痕

召見時後逢耕藉日

上屢言及汝前在耕藉臺和詩朕始賞識汝迷畱意拔用上每爲閣臣言之仰荷

注知特達真異數也

饒霽南先生招飲澹秋書屋

斐几銅餅尙凍冰
凌晨客思轉懽騰
新年怕聽先歸鴈
小閣欣看乍試鐙
七種菜羹聊復爾
半杯竹葉未能勝
簪來旂勝休相笑
無限春愁一夕增

聖駕四次南巡恭進權歌三十六首

謹序

欽惟

皇帝陛下法天行健
厯念民依比年來三

幸南服湛恩愷澤紛綸布濩閱三稔而東南士民懷思益切大吏據情入告

上洞鑒惻誠適南河之務暨浙西海塘工以次告蒞亦須親臨閱視指授機宜爲善後計遂

俯允所請于旃蒙孟陬之吉恭奉

皇太后安輿再蒞江浙

翠華經臨慶典燦備三五隆軌復此式觀沅備官禁近久

在屬車豹尾間作爲歌詩以宣

上德而達下情今茲來遊者四而

德日益崇

功日益懋雖非扣槃捫燭之見所以仰窺萬一而江之潯

河之潯或於煙波款乃中扣舷而歌以唱嘆

聖德亦採風者所不廢也謹擬權歌詞如左以

獻輿情肫懇庶于此足徵焉

江國頻年跂慕真而今重奉屬車塵東南四度游歌處恰

慶龍飛三十春

典慶祈年肸蠭崇元正練吉候條風青旗低颺新晴雪一路春燈識歲豐

淑氣初迴澤國寬迎鑾鎮外頌聲歡南邦風土俱親悉特詔先裁鄉導官

春旗楊柳一村村父老親承

天語溫豈有民間絲粟費仍聞所過議加恩

黃童白叟互牽裾萬歲聲呼瞻仰餘共說百花香裏過至尊親導

大安輿

異詔頻宣愷澤覃丁糧千萬免東南謳歌

帝力知何有賜復蠲租已再三

養老銀牌小字鐫扶鳩羅拜盡華顛就中及見

仁皇者猶說南巡乙酉年

南河蓄洩費周防躬履金隄壁畫詳一自璧牲親奠後安
瀾不數漢宣房

平疇幾稜綠雲橫樹外遙傳布穀聲正是插秧天氣好芳
郊停輦問春耕

帳殿臚歡舞彩同問安調膳樂融融鷺花三月春如海都
在

慈輿色笑中

熙春臺畔路三义佳麗江山處處誇夾道香風吹不斷紅

橋明月竹西花

扶輪大雅重詞壇集訂漁洋亦已難重過紅橋修禊地推

恩猶到舊推官

賜故刑部尚書王士正諡文懿

兩點金焦化域開江心縹緲湧樓臺山門玉帶畱題處韻

疊東坡已四回

鐵鎖長江絕地垠浪頭犀弩發千羣卽今荒徼烽煙靖簡

練頻煩閱水軍

青畚臺笠正翻犁力作全凭土脈滋

帝澤無私甘澍溥江南二月雨如絲

水田漠漠近江鄉圩岸高低覆綠楊好景馬頭看不厭麥

花如雪菜花黃

姑蘇風物最暄妍一色春波七里船此日

龍顏知有喜繁華較勝數年前

晴雪朝霏羽葆橫太湖西去近銅坑春深行殿排清供萬
樹梅花雨洞庭

蕃兒躍馬効前驅更有降王左右趨便是紫髯兼綠眼年
來也復熟吳歛

海湧峯頭百戲陳緣撞角觝技如神從前吳子何曾見此
是新歸絕域人

濯枝時節正靈霰競喜

天顏一再瞻山後山前人盡說雨中

大駕駐靈巖

山長水遠望迢迢宛轉紅闌四百橋特地壺中遲淑景仙

冀兩度紀花朝

是歲閏二月

桃花新漲碧粼粼村落人家傍水濱停棹鴛鴦湖畔路陌頭半是採桑人

湖光半入莊嚴界花柳都含歡喜心尤愛蘇堤入圖畫宜晴宜雨豁

宸襟

峯到飛來面面佳清涼福地辟塵譁孤山梅子雲林筍活火還烹龍井茶

承恩魚鳥戀霓旌江上觀潮月正盈差喜臨安風氣朴重甯三日慰輿情

龕赭雙門一線收草塘工竣石塘修只因善後紆籌策幾
度飛梁駐彩旂

鑾輿往復路迴環供頓煩文悉與刪好景晚春真入畫一
痕青到白門山

樓霞絕磴翠雲封竹韻花香路幾重前度

宸遊揮翰處墨花猶濕六朝松

礼數優崇重引年兒孫扶拜

聖人前道旁競說溫綸下白髮詩人羨沈錢

時老臣沈德潛錢陳羣俱特賜

宮街

採風不費陳詩職破格羣沾稽古榮此次

臨軒尤鄭重親題甲乙到諸生

雲日暉光照法林，諸天宮殿布綸音。
奉香爲祝

慈寧壽，每到精藍輒賜金。

安福艦連如意舫，嵩呼人逼短長亭。
願將身逐春江水，一路吳歌達

帝聽。

祠官數典重升馨，河嶽懷柔及萬靈。
聞道力排封禪議，金繩玉檢陋云亭。

一晴一雨繫天心，今歲春晴直至今。
欲識勤民無倦意，到京又要盼甘霖。

偶廬謠諑及江河，釀化由來感頌多。
準擬湖天明月夜，沿流清聽榜人歌。

以詩代書答友人見訊近況

未得裁箋候起居翻蒙江上惠雙魚
一身遠寄千峯外百舌爭鳴二月初
奇石古於尊者相老藤纏作獻之書
故交欲識春來狀融雪寒泉澹不如

先大父忌日作

哀恤空銜骨今經十六年感時長作客
飲恨已終天負土寧堪待成名亦枉然
遙知寒食近草滿殯宮前

錢舜舉寫東坡先生遊赤壁圖

漠漠長絹含涼風妙手貌出修髯公
扁舟一葉酒一斗兩崖斗削青巖嵒
舉柁招孤鶴橫笛驚潛龍山高夜悄悄
石峻波洶洶似有懷古意手指荆門東
不見舳艫互千里尙

驚石壁畱殘紅
世事俯仰換玉局
悲遺蹤千戈詞賦兩蕭瑟
惟有山間明月終古沈影荒江中

登聽雨樓看山作歌

青山舊識盟未寒
翠屏飛繞紅闌干
煙鬟霧髻爭娟妍
忘却出山已廿年年
來年去凋朱顏山靈誚予孤清緣
幼好奇服棲林泉
靈巖絕頂琴臺邊
金庭咫尺不學仙
彌勒同龕不學禪
收拾湖山風月閒
歸我畫本同詩篇
山上看山復有山
不知身在山中間
自從匹馬走藝燕
繚花錦石霾風煙
出門大道車駢闐
重城老屋賃數椽
如羊觸藩駒寄轅
長鬢南來言不歡
故園梅鶴亦黯然
孤萍無著寓又遷
斗室額以西涯傳
飛樓切雲勢翩翾
朱梁壘金藻井蓮舊

聞權門甲第聯錦瑜樺燭沸管絃前人失勢後人憐至今
廢井淘遺鈿老石僵臥背字鐫滄桑眼見不肯言我來裙
屐招名賢酒兵文戰壘益堅西山龍子不在淵飲予墨池
何蜿蜒雲霧晦明狀萬千騰拏文字滿錦箋峯峯揖我導
我先相與古今俛仰焉樓頭雨聲入夢喧推窗白雲來周
旋風花愁殺江南天

同年諸中之編修出守辰州作詩贈別凡以志兩
人交誼廿載游蹤俯仰流連不覺詞費得一百
四十韻

帝城暮春天風雨花冥冥滿街賣將離花前送君行君行
何所之畫戟森南荆仙官驂鸞鳳飛下白玉京霖雨從此

始默爲蒼生慶所嗟良友去別懷增懣騰遠道六千里離
尊一再傾感君結交意陳我終始情髫齡走京師羞挾王
門箏焚巢嗟旅雁伐木歌鳴鴛轅轍互南北隔面聞君名
風煙意慘淡知有摩空鷹三獻璞尙抱十年字猶貞神交
乍閱歲癸酉賢書登得第竊私喜喜心利得朋次年赴春
闈躋躋還相仍詔下門下省中書實需人叶鄭重兩制選
工妙八體升時論推吾子紙貴長安城洛神三四行光溢
剡溪藤琳琅倒金籀蓄眼見未曾院試紅藥詩第一霏清
聲率絲入丹地清要得所憑時務旣通達典故每恃徵是
時當國者溧陽與虞山叶遭逢國士遇歷試靡弗勝內閣
重票擬倚畀崇疑丞藉君左右手手手分緯經壯齒盛才

氣五嶽生圭稜論事中竅要批駁莫敢撓

宸製伊犁碑百尺高凌兢妙選好手筆衆以君名應淋漓
掌大字字字結構精龍蛇走腕下相公稱其能殷勤補薦
牘機地職是膺夕郎簪綵豪鎖闥嚴西清與君始同官珺
佩聯東丁道誼雲隨龍步趨影附形廟堂正籌邊西域未
休兵羽書飛旁午視草責匪輕章奏等山積迅掃筆不停
嚴霜紆玉螭曉月寫金莖屬車豹尾間短衣歲徂征杏花
田盤山黃葉興安嶺叶聯牀臥穹廬並轡馳驥驂攬翠玉
泉雨納涼瑞園督在海淀軍機同人下直處別入慣西出飛光轉飄轆十尋
掖垣梧五落仙堦冀南宮再射策斗柄歲指庚兩人並及
第吉語傳分明道傍識名姓清班隸嶠瀛君以製作手領

袖來槐廳鏗鏘碑版文刻畫鐫瑋瑛詞旨麗以則體裁肆
且宏此官散仙同崑閩不受局同人三五輩良會逐日新
叶消寒釀屢訂聽雨韻迭賡清談玉屑霏雋想珠淵靜叶
校書街鼓促鬪酒拇陣轟有時發狂言睥睨一世雄叶璿
瑜歌堂月風雪春城鐙寒食法源寺重九陶然亭不厭勝
游數那禁豪情弭歡騰少年場瞥來月旦評萋菲織貝錦
駭語蜚旬旬君智巧自衛暗弩不及身叶蒼蒼山頭柏冬
夏常青榮矯矯雲中鶴天衢敝修翎介石石不轉止水水
常激從容自中道抱蘊能畢呈史局總編摩琅函照珠擎
圭璋協粹品鳳凰偕和鳴星輶指山左識拔皆殊英蝸蟻
沸羹秋先正見典型以茲式多士頽風或可撐客歲夏四

月

天子發德音

叶

翰林儲材地朕將試以政

叶

輔臣慎遴選

臨軒注璿屏今年乙酉春閏月月未盈豫遊省南服吳會

停雲輶

手勅降行在朱書金鳳綬楚南方面任往哉汝欽承辰州

滇黔衝鎖鑰嚴關爭壺頭五溪蠻雄險規沅陵江山奇絕

處谿洞紛篴篴盤瓠種彫繡狔狔語僮僮自從格王化威

暢捐鼓鉦當年淫毒水變作甘霖蒸專城此重寄撫馭有

責成徭民雜耕織虎節揚聲靈朱幃護衛列貝冑公徒烝

爵視二千石古與諸侯均

叶

君才不可當如鉉發新礪志

操貫金石誠信孚婦嬰縱嫺讀律法母以刑術浚班史循

吏傳庶幾再見今叶奈予感離索掩關臥春明彈指五六

載人事迭變更素心日以少素鬢日以增繁如春前花散

若琴上星去年送王郎臨安太守夢樓萬里滇南程明朝又送君門

外催幢旌行矣隔山岳所思在湘衡九疑望聯緜煙雨空

峻嶒秋風洞庭波木落千峯青鷓鴣叫斑竹能使客淚縈

想登拱辰樓那免心忤忤迢迢朔雁落靄靄南雲橫宦海

杳無岸飄泊兩葉萍相思不相見後會難預定叶疇昔訂

交初風義師友并賤子性落拓長此守硜硜素乏脂韋骨

低顏拙逢迎好修授雅範獨立憂衆憎蒙君親愛我弟我

君爲兄本屬金蘭契申以膠漆盟中道一分手顧影傷伶

仃輕別吾所諱心悲古所懲丈夫志萬里勿作兒女憐叶

況君志康濟流譽冠羣英窮爲蟠泥龍達作摩天鵬勿矜
名地重勿受世網營經術飾治術依然一儒生雙親頭雪
白睂壽躋遐齡有官不能養焉用鐘鼎烹君今往楚服版
輿慰寢興子臣兩無負寤寐獲所寧風霜飽閱歷事業見
崢嶸道理旣已熟意氣亦自平佳節逼上巳河梁柳娉婷
開我得石軒倒我雙玉餅歡君盡樽酒明發驅車乘且著
賜衣錦聊脫頭銜冰行看三公服露冕宣喬卿茂茲芳蘭
體展矣明德馨人去春亦去別酒醉還醒他時夢君顏梁
月光熒熒常因風雨夕未免心魂驚萬花鏡湖曲梅花香
水舫遲君十年後歸田耦而耕

三月四日學士錢蔣石辛楣兩前輩編修趙雲松

曹來殷沈景初庶常褚左莪吳沖之中翰王蘭
泉程魚門趙損之汪康古嚴冬友陸健男沈吉
甫諸同人重展上已修禊陶然亭卽席有作

重三韶序記元已執蘭招魂國風始風流盛於魏晉間觴
詠亦以名人傳諸公袞袞雄詞壇意氣凌厲追前賢招攜
舊雨修禊事不惟其事惟其意惠風和暢天氣清陶然人
坐陶然亭亭旁蘭若大于斗四面空青拓窗牖沖融幽澗
漲桃花堆阜連岡斷齋曰繁英紅墮晚春風浮嵐翠滴新
晴柳題襟接席相流連敘以林泉醉以酒竹林談笑擬步
兵洛社詩篇繼畱守京華予于廿年久良會不多此其偶
曲水序蘭亭詩古人風雅今人師往來人事遞今古後之

視今亦猶斯

立秋

井梧一葉墮三更樹杪涼生夜氣清
鐙影未闌雞又喚預愁明日聽秋聲

夜月初殘不上鉤銀河碧落淡悠悠
明朝匹馬千盤去領

畧邊關一帶秋

時有馬蘭峪之役

通州道中

入秋暑雨歇柳外送新涼
古戍依流水嚴城帶夕陽
寒蟬催露急晚稻散花香
清潞東流去何時到故鄉

將抵通州路遇李斗如王步東兩秀才應試北上

喜而有作

乍試征衫走馬身
鞭絲帽影拂輕塵
陌頭髣髴聞吳語
不道相逢是故人

渡潞河

歷歷千帆上水遲
行人勒馬潞河湄
村墟野店荒雞唱
落日西風喚渡時

煙郊書所見

溶溶汗粉透冰肌
細葛輕衫適體宜
新雨乍晴門半掩
豆棚花下納涼時

過桃花寺

左輔雄圖控薊州
鶯花歲歲奉

宸遊自隨

翠輦來三月相別盤山只一秋

予扈 蹕暨去 秋凡兩游於此

嵐彩曉添晴

旭麗溪泉遙帶濕雲流依稀認得桃花寺行殿崔嵬在上頭

馬上望盤山

萬株松樹鬱虬柯面面巉巖壓礪阿識得盤山真面目去年曾向此中過

飛泉

玉峽靈源注層厓一綫懸常懷清潔性何礙出山泉
旅店聞蟋蟀

蟋蟀對人語淒淒近五更山深涼意早謝爾伴孤清

宿吉祥庵

亂雲深處古珠宮
禪榻茶煙颺晚風
絡緯吟殘塵夢杳
紙窗斜閃佛燈紅

山門雨扇萬峯遮
小院疎籬石逕斜
莫笑道人無底事
迎晨汲井灌秋花

一景泰廢陵

頽雲壓危岡
驚颺起沙礫
野鳥空林呼日瘦
氣慘威四郊
虛無人落葉堆一尺
策馬山徑轉一坏
寄寥寂壤隧翳黃
蒿低塞煙冪歷返景入蓬顆
狐兔竄瓦甃前朝土木案青
史事歷歷閭豎竊魁柄乘輿冒鋒鏑
龍戰入虎口九鼎試一擲
衆志已瓦解社稷正危亟得計而居奇
需索百千億
蹇蹇匪躬臣慷慨建大策內修政治平外拒烽烟迫人心

得以安也先無所獲一飯三吐哺齧齒誓報國隻手扶乾
坤皇天洞昭格英英神武姿言聽計從畫上下同一心君
臣契不隔憂勤莅政事中外稱令辟良由知人明亦以宵
旰力初政實可觀其後稍堪惜嗚呼人情常責備亦何益
然其奠定功千古不可易旋乾而轉坤禍患從此息畢竟
迎鑾輿仍將返沙磧飲水須知源火葵莫狼藉奈何乘危
亡卒受讒姦惑奪門以爲功其名亦可嚇天地爲飲血忠
臣竟誅磔日月懸中天人間夜寥聞安得起九原手刃徐
與石迴頭望金山坎窞橫廣陌風搖白楊樹蕭蕭尙哀盛
蒼茫弔荒陵夕照來暝色

秋日病起詒堂竹虛招飲寓齋卽席賦贈

故友開新釀頻蒙折柬招帶因多病緩馬爲久閒驕池冷
荷將歇泥乾竹欲焦邇來常止酒今忽過三蕉

秋日卽事同錢辛楷作

向陽秋筍露微尖小立蒼苔展齒黏對客事先徵石鼎吟
花體易近香匳茶甘畢竟因泉淡詩好何曾在韻嚴恰喜
今宵逢二八早開風幔待涼蟾

聽雨樓對雪用歐陽文忠公聚星堂雪詩韻并效

其體

不知天花亂辭萼夜窗但怪寒威薄重衾壓體如紙輕蜩
縮匡牀夢難作曉起登樓天已晴茫茫一色迷寥廓光芒
射眼冷酸鼻晶瑩愛得朝陽爍修竹停多頭漸低老松擎

重釵將落曲室重幃坐擁鑪綈袍不異衣狐貉取筆思賡
前哲句屈僵十指難拏攫乾坤如此安得食忍飢憐彼簷
端雀陋巷亦有行人行來往縱橫印木屨已卜明年飽麤
麥寸心竊爲天下樂呼童收拾貯甕盎試茗預備炎天瀹
更念

王師掃狐兔萬竄羆貅屯大漠我願疾馳下蔡州渠魁授
首縣矛槩軍門釋甲慶成功醺酒椎牛恣歡噱

陽湖門人孫星衍編校

靈巖山人詩集卷十八